

von Wulf Wager

# Baumfreveleia



Mei Nochbere, Sia wisst jo, des propere 150-Kilo-Prachtsweib, hot a paar Beem em Garda, dia ihra Zwetschga, Kirscha, Äpfel ond Goißhirtla brengat. Aber net bloß ihra. Au mir profitierat von dene siaße Frichtla. Aber von Zeit zu Zeit kommt so a Boom en a Alter, wo mr'n rausmacha muaß. Also hot mei Nochbere ihrem Bruadr a'gruafa

ond ihn gebäta, den erschta Kirschaboom en dr vorderschta Roih rauszommacha, au weil se do a Hofei'fahrt macha lassa hot wölla. Am Wochenende hot'r des Gschäft aganga wella. Mei Nochbere war net do. No isch'r a'grückt ond hot an erschta Baum vrsuacht rauszomacha. Rengsrom hot'r uffgraba ond versucht den Kerle aus em Boda zom bringa. Des hot aber net so richtig funktioniert. No isch'r fortgfahra ond hot a 4-Tonna-starke Soilwend' drherbrocht. Dia hot'r aber an meim Zwetschgaboom befeschtigt ond no kräftig Spannung aufbaut. Dr Erfolg war schnell sichtbar, denn mein Zwetschgaboom hot sich geneigt wie dr schiefe Turm von Pisa ond no derra Spannung vollends nochgeba. Den hot's omgnomma, wia en Volksfeschtbesucher noch dr sechsta Maß. Aber meiner Nochbere ihr Kirschaboom isch äwwl no gstanda wia a Ois. Em Bruadr von meira Nochbere war's aber zemlich peinlich. Er hot no dapfer mein Boom zersägt ond mir des Holz schee aufbeigt. No hot'r doch no seira Schweschter ihrn Bomm gfällt brocht ond ebafalls sauber zersägt. Wo mei Nochbere no hoimkomma isch, war se allerdings zemlich entrüschtet, denn ihr Bruader hot da falsche Boom rausgmacht. Jetzt muaß se halt uff dr andera Seit' vom Haus ihr Hofei'fahrt macha ...

Bis näggschd Woch

Ihr

Wulf Wager

Alle Kolumna zom Nochlesa